

आकाशवाणी

पैहले खास-खास खबरां:-

1. प्रधानमंत्री नरेन्द्र मोदी होरें सब्बनैं राज्यें गी आखेया ऐ जे भारत गी विनिर्माण दा प्रमुख केन्द्र बनाने लेई ओ उत्पादन ते विनिर्माण लेई साजगार माहौल उपलब्ध करान।
2. राष्ट्रपति द्रौपदी मुर्मू होर एन.आई.टी जमशेदपुर दे दीक्षांत समारोह ते संथाली भाषा दी OI चिकी लिपि दे शताब्दी समारोह च शिरकत करगंन।
3. दिल्ली एन.सी.आर. सनैं उत्तर भारत दे ज्यादातर हिस्सें च धुंध कारण आम जन-जीवन बुरी चाली प्रभावत।
4. अमरीकी राष्ट्रपति डोनाल्ड ट्रम्प ते यूक्रेन दे राष्ट्रपति जेलेन्सकी बशकार रुस-यूक्रेन संघर्ष खत्म करने पर गल्लबात।
5. महिला क्रिकेट च कल मजूदा श्रंखला दे चौथे टी-20 मैच च भारत नै श्रीलंका गी 30 रन्ज कन्नै रहाया।

<><><><><><>

PM -Conference

प्रधानमंत्री नरेन्द्र मोदी होरें सब्बनैं राज्यें गी आखेया ऐ जे ओ उत्पादन ते बपार छमता गी बढ़ावा देने लेई इन्ने क्षेत्रें च कम्म करने गी सखल्ला बनान-तां जे भारत गी कुल संसारी सतह पर विनिर्माण दा इक प्रमुख केन्द्र बनाया जाई सकै। नमीं दिल्ली च मुख सचिवें दे 5में राष्ट्रीय सम्मेलन गी सम्बोधत करदे होई मोदी होरें आखेया जे भारत तौले गै राष्ट्रीय विनिर्माण मिशन शुरु

करोग। उ'नें हर इक राज्य गी इसी सब्बनें शा मती तरजीह देइयें कम्म करने ले'ई बी आखेया- तां जे मती-मती कम्पनियें गी इत्त बक्खी आकर्षत कीता जाई सकैं। उ'नें एहदे ले'ई लोड़चदा बुनियादी ांचा तयार करने ले'ई बी आग्रह कीता। “विकसित भारत लेई -मनुक्खी संसाधन वसीलें” विषय पर त्रै-रोजा एह सम्मेलन 26 तरीक गी शुरू होआ हा। भारत दी जनशक्ति दा जिक्र करदे होई मोदी हो'रें आखेया जे देशें दी 70 प्रतिशत अबादी कम्म करने दी छमता दी श्रेणी च औंदी ऐ- जेहदे करी आर्थिक तरक्की लेई विशेष मौकें उपलब्ध न ते एहदे नै विकसित भारत दे लक्ष आहली बक्खी देसैं दी यात्रा गी होर रफ्तार हासल होग।

<><><><><><>

President –Jharkhand Visit

राष्ट्रपति द्रौपदी मुर्मू होर झारखंड दे त्रै-दिने दे दौरें पर कल रांची पुज्जियां। अज्ज उं'दा चिकी लिपि दे शताब्दी समारोह च शिरकत करने दा कार्यक्रम ऐ। एहदे इलावा ओ एन.आई.टी जमशेदपुर दे दीक्षांत समारोह च बी हिस्सा लैगन।

<><><><><><>

FOG -Delhi NCR

दिल्ली ते नोएडा च घने कोहरे करी दूर तगर दिक्खने च परेशानी आवा'रदी ऐ। दिल्ली दे इंदिरा गांधी अंतराष्ट्रीय हवाई अड्डे नै कोहरे गी दिक्खदे होई एडवाज़री जारी कीती ऐ। यात्रियें गी अनुरोध कीता गया ऐ जे ओह अपनी फ्लाइट बारे ताजा जानकारी आस्तै सरबन्धी एयर लाईन्स गी सम्पर्क करन। एयर इंडिया नै फ्लाइट ऑपरेशन च संभावित रुकावट बारे बी एडवाज़री जारी

कीती ऐ। स्पाइस-जेट नै बी अपने ताजा परामर्श च आखेया ऐ जे दिल्ली च सारी जाने ते औने आहलियां डोआरियां खरी चाली दूर तगर नजरी नेंई औने करी बाधित होई सकदियां न।

<><><><><><>

IMD Weather

मौसम विभाग नै इस महीने दी 31 तरीक तगर हिमाचल-प्रदेश- पंजाब- हरियाणा- चंडीगढ़- दिल्ली- उत्तर-प्रदेश ते बिहार च घने कोहरे दी शेंका गी दिक्खदे होई ऑरेंज चेतावनी जारी कीती ऐ। पूर्वोत्तर भारत- ते ओडिशा दे किश हिस्से च घनी धुंध छाए रौहने दा अनुमान ऐ। मौसम विभाग नै अज्ज दिल्ली- हरियाणा- चंडीगढ़- छत्तीसगढ़- मध्य-प्रदेश ते पंजाब दे किश हिस्से च सीत लैहर चलने दा बी अनुमान लाया ऐ। मौसम विभाग नै अगले 2-3 दिनें च अंडमान ते निकोबार द्वीप समूह च गरज-चमक कन्नै बरखा पौने दी बी पेशगोई कीती ऐ।

<><><><><><>

V.P- Puducherry Visit

उपराष्ट्रपति सी.पी. राधाकृष्णन हो'र अज्ज इक दिनें दे दौरे पर पुडुचेरी जा'रदे न- जित्थे ओह स्मार्ट सिटी मिशन दे तैहत इक रिहायशी परियोजना दी शुरुआत करगंन ते कंबन कलई-रंगन च लाभार्थियें गी 5 घरें दियां चाबियां सौपगंन। एहदे बाद ओह ईश्वरन काँइल स्ट्रीट च भरतियार स्मारक पर महाकवि सुब्राह्मन्य भरतियार हुं'दी मूर्ति परा पड़दा गोहाड़गंन। उपराष्ट्रपति हो'र कुमार

गुरुपल्लम स्थल पर स्मार्ट सिटी मिशन आवासीय परियोजना दे लाभार्थियें कन्नै गल्लबात बी करगंन। एहदे इलावा उन्दा मूला कुल्लम च पेटिट सेमिनार स्कूल दे सीनियर सैक्रेट्री ब्लाक दा उदघाटन करने दा बी कार्यक्रम ऐ। उपराश्ट्रपति हो'रें अज्ज गै राधाकृष्णन कलापेट च पुडुचेरी युनिवर्सिटी दे 30में दीक्षांत समारोह दी बी अध्यक्षता करगंन- जेहदे मगरा ओ तिरुवनतपुरम लेई रवाना होई जागंन।

<><><><><><>

Zelensky- Trump Meet

यूक्रेन दे राश्ट्रपति ब्लादिमीर जेलेस्की हो'रें कल फ्लोरिडा च अमरीका दे राश्ट्रपति डोनाल्ड ट्रम्प हुं'दे नै मलाकात कीती। दौनों नेताएं बश्कार रुस कन्नै जारी युद्ध गी खत्म करने लेई शांति योजना पर गल्लबात होई। राश्ट्रपति ट्रम्प हो'रें इस बैठक गी मती कामयाब दस्सेया ते आखेया जे रुस ते यूक्रेन दवै लड़ाई खत्म करना चाहंदे न। संवादताताएं कन्नै गल्लबात करदे हो'ई उ'नें मेद प्रगट कीती जे अगले किश हफ्तें च शांति वार्ता पूरी होई जाहग।

<><><><><><>

Year Ending Reform

बरा 2025 भारत दी विकास यात्रा च महत्वपूर्ण ध्याऽ रेहा ऐ। इस बरे केंई नीतियें गी हकीकी रुप दिता गया ऐ- इंदे माध्यम कन्नै प्रगति गी साकार बनाया गया ऐ। अज्ज अपनी बशेश श्रंखला-“सुधारें दे बरें” च अस रक्षा खेतर च होई दी प्रगति दी चर्चा करा करने आं। 2025 भारत दी राश्ट्री सुरक्षा दे खेतर च

बड़ा महत्वपूर्ण बरा रेहा ऐ- कीजे प्रधानमंत्री नरेन्द्र मोदी हो'रें आतंकवाद दे खलाफ 5में नियम स्पष्ट कीते ते आखेया जे भारत परमाणु हमले दी धमकियें अग्गे नैई झुकोग ते आतंकवादियें ते उनेंगी पनाऽ देने आहलें गी इक्कै बरोबर मन्नियै उ'दे खलाफ कारवाई करोग। पहलगाम हमले दे बाद जंदी 7 मई गी भारत नै आपरेशन सिंदूर दे राहें पाकिस्तान दे अंदर स्थित कैई आतंकवादी ठिकानें गी निशाना बनाया। एदे ले'ई भारत नै स्वेदशी ब्रह्मोस मिसाइलें- रफाल लड़ाकु ज्हाजें ते ड्रोनें दा इस्तेमाल कीता हा.

आतंकवाद खलाफ तगड़ी कारवाई दे अपने मजबूत धेइये दे कन्नो-कन्नी भारत दी रक्षा समर्थ नै बी बड़ा बाददा विस्तार दर्ज कीता ऐ। इस बरे भारत नै स्वदेशी रक्षा तकनीकें च बड़ी उपलब्धियां हासल करदे होई नां छड़ा जंगी ज्हाजें ते पनडुब्बियें गी बलें दियें कारवाइयें च शामिल कीता ऐ सगुआं Agri Prime Missile दा रेल आधारित परीक्षण ते भारत च बनी दी AK-203 रफलें दा इस्तेमाल बी शुरू कीता ऐ।

<><><><><><>

Delhi Env. Min.

दिल्ली दे पर्यावरण मंत्री मनजिंदर सिंह सिरसा हो'रें आखेया ऐ जे दिल्ली सरकार शैहरा च प्रदूषण दी चुनौती कन्नै निबड़ने लेई IIT कानपुर कन्नै आर्टिफीशल इंटेलीजेंस आधारित तंत्र पर सहयोग दियें संभावनाएं दा पता लाने पर कम्म करा'रदी ऐ। उ'नें आखेया जे इस कोशश दा मकसद प्रदूषण दे अस्सल स्रोतें दी पंछान करना ते समें-सिर कारवाई करना ऐ। उ'नें आखेया जे

इस पैहल कन्नै इक ऐसा तंत्र सरिस्ता तयार होग- जेहदे नै उप्परोतली निगरानी रखने- विश्लेषन करने- पैहले सवां अंदाजा- अनुमान लाने ते कारवाई लेई मार्ग- दर्शन हासल होग ते प्रदूषण दी समस्या कन्नै असरदार ढंगै सिर निबडने च मदाद होग।

<><><><><><>

Women's Cricket

ते हून महिला क्रिकेट- भारत ते श्रीलंका बश्कार मजूदा टी-20 मैचें दी श्रृंखला दे चौथे मैच च कल भारत नै महमान टीम गी 30 रन्ज कन्नै रहाई दिता। पैहले बल्लेबाजी करदे होई भारत नै 222 रन्ज बनाए ते श्रीलंका दे सामने 222 रन्ज दा लक्ष्य रखेया। श्रीलंका दी टीम 20एं ओवरें च 6 विकटें दे नुकसान पर 191 रन्ज गै बनाई सकी।

<><><><><><>